



7 Februari 2013
7 February 2013
P.U. (A) 44

WARTA KERAJAAN PERSEKUTUAN

FEDERAL GOVERNMENT GAZETTE

PERINTAH CUKAI PENDAPATAN (PENGEQUALIAN) (NO. 8) 2013

INCOME TAX (EXEMPTION) (NO. 8) ORDER 2013



DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA CUKAI PENDAPATAN 1967

PERINTAH CUKAI PENDAPATAN (PENGECUALIAN) (NO. 8) 2013

PADA menjalankan kuasa yang diberikan oleh perenggan 127(3)(b) Akta Cukai Pendapatan 1967 [Akta 53], Menteri membuat perintah yang berikut:

Nama dan permulaan kuat kuasa

1. (1) Perintah ini bolehlah dinamakan **Perintah Cukai Pendapatan (Pengecualian) (No. 8) 2013**.

(2) Perintah ini disifatkan telah mula berkuat kuasa dari tahun taksiran 2011.

Tafsiran

2. (1) Dalam Perintah ini—

“aktiviti yang layak” ertinya apa-apa aktiviti yang berikut, dijalankan oleh orang yang layak dalam Kompleks RAPID:

- (a) pengadunan, memproses atau pemecahan minyak mentah, kondensat, suapan atau suapan pertengahan;
- (b) pengeluaran, pembuatan atau pembangunan keluaran petroleum, petrokimia, kimia, produk pertengahan, akhir atau pengeluaran berkaitannya;
- (c) penyimpanan, perumusan, pengadunan, pengagihan atau pemasaran petroleum, petrokimia, kimia, produk pertengahan, terakhir atau pengeluaran berkaitannya;
- (d) pengegasan semula LNG kepada gas dan pengagihannya relevan; atau

- (e) penjanaan, pengagihan atau jualan semua bentuk utiliti termasuk tetapi tidak terhad kepada elektrik, air, wap, gas, hidrogen, udara atau pengolahan bahan buangan;

“dilakukan” mempunyai erti yang sama sebagaimana yang diberikan dalam perenggan 46 dan 55 Jadual 3 Akta;

“dilupuskan” ertinya dijual, dibuang, dimusnahkan atau jika ia tidak lagi digunakan bagi maksud aktiviti yang layak;

“Kompleks RAPID” ertinya kompleks yang mengandungi loji pemecahan cecair, loji penapisan, loji petrokimia atau pengeluaran kimia dan semua kemudahan sokongan dan tambahan termasuk tetapi tidak terhad kepada cecair gas asli (LNG), Terminal Penerimaan dan Pengegasan Semula (RGT), loji berkuasa COGEN, kemudahan penyimpanan atau kemudahan pengolahan bahan buangan, dan terletak di Pengerang, Johor;

“orang yang layak” ertinya—

- (a) Petroliam Nasional Berhad;
- (b) mana-mana syarikat lain yang diperbadankan di bawah Akta Syarikat 1965 [Akta 125] yang Petroliam Nasional Berhad memegang sekurang-kurangnya 51 peratus modal berbayar dalam saham biasa; atau
- (c) mana-mana syarikat lain yang diperbadankan di bawah Akta Syarikat 1965 yang menjalankan aktiviti yang layak dalam Kompleks RAPID yang Petroliam Nasional Berhad memegang, sama ada secara langsung atau tidak langsung, saham biasa di dalam syarikat itu.

“projek yang layak” ertinya projek yang dijalankan oleh seorang yang layak dalam mengembangkan pemodenan, mengautomatikkan atau dalam mempelbagaikan aktiviti yang layaknya yang sedia ada yang dikecualikan di bawah Perintah Cukai Pendapatan (Pengecualian) (No. 6) 2013 [*P.U. (A) 40/2013*] dalam industri yang sama dan dijalankan oleh orang yang layak dalam Kompleks RAPID bagi RAPID;

“perbelanjaan modal yang layak” berhubungan dengan pengilangan atau pemprosesan, ertinya perbelanjaan modal yang dilakukan atas—

- (a) peruntukan mana-mana kilang atau atas mana-mana loji dan jentera yang digunakan di Malaysia berkaitan dengan dan bagi maksud projek yang layak; atau
- (b) peruntukan mana-mana bangunan atau atas mana-mana loji dan jentera yang digunakan di Malaysia berkaitan dengan dan bagi maksud projek yang layak berhubung dengan penyelidikan dalaman,

dengan syarat bahawa perbelanjaan modal yang layak itu tidak termasuk perbelanjaan modal yang dilakukan ke atas bangunan yang digunakan sebagai tempat kediaman bagi seseorang, loji dan jentera yang disediakan keseluruhannya atau sebahagiannya untuk kegunaan pengarah atau individu yang merupakan anggota pihak pengurusan, pentadbiran atau pekerja perkeranian bagi orang yang layak itu;

“syarikat yang berkaitan” mempunyai erti yang sama sebagaimana yang ditakrifkan di bawah seksyen 2 Akta Penggalakan Pelaburan 1986 [*Akta 327*].

(2) Bagi maksud Perintah ini, “RAPID” adalah singkatan bagi Pembangunan Integrasi Kilang Penapisan Minyak dan Petrokimia.

Pemakaian

3. Perintah ini hendaklah terpakai kepada orang yang layak yang telah membuat permohonan bertulis berkenaan dengan projeknya yang layak kepada Lembaga Pembangunan Pelaburan Malaysia dalam tempoh sembilan puluh hari sebelum tempoh pengecualian di bawah Perintah Cukai Pendapatan (Pengecualian) (No. 6) 2013 [*P.U. (A) 40/2013*] tamat.

Pengecualian

4. (1) Menteri mengecualikan orang yang layak pemastautin di Malaysia dalam tempoh asas bagi tahun taksiran daripada bayaran cukai pendapatan berkenaan dengan pendapatan berkanun yang diperolehi daripada projek yang layak yang bersamaan dengan jumlah elaun sebagaimana yang ditentukan dalam subperenggan (2).

(2) Amaun elaun yang disebut dalam subperenggan (1) hendaklah menjadi seratus peratus daripada perbelanjaan modal yang layak dilakukan dalam tempoh asas bagi suatu tahun taksiran bagi tempoh lima tahun taksiran berturut-turut (selepas ini disebut sebagai “tahun taksiran yang dikecualikan”).

(3) Permulaan kuat kuasa tahun taksiran yang dikecualikan yang disebut dalam subperenggan (2) hendaklah dalam tempoh asas bagi tahun taksiran perbelanjaan modal yang layak yang pertama dilakukan oleh orang yang layak itu.

(4) Jika orang yang layak melakukan perbelanjaan modal pertamanya yang layak berhubung dengan projek yang layak yang disebut dalam subperenggan (1) yang akan dijalankan, bahawa perbelanjaan itu hendaklah disifatkan dilakukan dalam tahun asas bagi tahun taksiran yang mana orang yang layak mula menjalankan aktiviti itu.

(5) Tiada apa-apa jua dalam subperenggan (1) boleh dibebaskan atau disifatkan telah membebaskan orang yang layak itu daripada mematuhi apa-apa kehendak bagi mengemukakan apa-apa penyata atau penyata akaun atau memberikan apa-apa maklumat lain di bawah peruntukan Akta.